

Beatrice Deflorin

Cavorgia e Selva 1960-2002



bb-La nova che la Beatrice da Cavorgia seigi sedis-graziada cun siu auto ha fatg ins tut perplex. Igl ei era muments che portan consternazion. Contas gadas ha ins entupau ella cun siu auto, en l'ustria, ni schiglioc sin via. Cun in cuort salid, magari era senza, ein ins ira sperasora e mintgin ha giu ses agens patratgs. 42 onns eis ella vivida denter nus, sper e cun nus. Magari sefan ins en pér cura ch'enzatgi ei morts ch'els eran avon cheu.

Beatrice Deflorin ei naschida ils 9 da matg 1960. Carschida si a Cavorgia cun la mumma ed ense-men cun ils augs. Cheu a Cavorgia frequenta ella l'emprema classa. Igl onn 1968 marida sia mumma Genoveva il pur Toni Vigeli Deflorin da Selva e secasan era leu.

Duas soras, la Regina e la Susanne neschan cheu. Temps da scola a Rueras e puresser ein ussa sia veta quotidiana. Era suenter il temps da scola stat ella vinavon a Selva e gida a far il pur il Toni Vigeli. Ina buna luvrera, che senuspeva buca da luvrar e saveva luvrar. Mo ei seigi dad ira precaut entuorn cun ella, schiglioc seigi il di lavagaus e la luvrera naveen, ha il Toni Vigeli giu menziunau inagada. Gest quei punct ha custau ad ella la sanadad e schau daventar ella ina persuna retratga e da sia vart. Sia mumma, la Genoveva, miera igl onn 1993. Il medem onn, vid igl atun, retuorna ella a Cavorgia tier ses augs nua ch'ella sesenteva propi da casa.

Ha ella giu hobi's, giavischs, plaschers? Gie, bia sa ins buca. Pretensiusa era ella buca. Il grond giavisch e plascher, ei adina stau siu auto. Esser empau movibla e saver carrar en tuttas direcziuns. Cun quel ha ella era saviu dar anavos empau da siu plascher e segidar cun ses augs tier cumissiuns, far magari spassegiadas cuortas ed era pli liungas. E lu star ensemens cun igl aug Nazi e tubaccar ensemens ina.

«Jeu sun perschuadius che las sufrientschas dil temps present ein gnanc da pareglier cun la gloria che duei vegnir revelada enten nus»: Plaids da sogn Paul tier il riug da bara. Cardientscha e speranza che nus havein retschiert entras nossa religiun. Plaids che nus udin savens tier sepulturas. Tonschan quels lura, ni vivin nus era els avon, duront il far da mintgadi, duront il viver ensemens? Sche quels plaids possan muentar nus egl intern ei la veta e mort da Beatrice stada per nus in schenghetg. Possi ella ver anflau la gloria e pasch perpetna!